

光緒山西通志

鄉賢錄五

錄二之五

山西通志弟一百一十

賜進士出身頭品頂戴兵部侍郎兼都察院右副都御史巡撫山西提督軍務臣張昺等

旨監修

北周

南朝

宋齊梁

王軌太原祁人漢司徒允之後世爲州郡冠族魏時賜姓烏丸氏父光少雄武有將略周文帝遇之甚厚位至驃騎大將軍開府儀同三司又拜上開府軌性質直起家事輔城公及武帝卽位累遷內史下大夫遂處腹心之任帝將誅晉公護軌贊成其謀建德初轉內史大夫加開府儀同三司又拜上開府儀同大將軍封上黃縣公軍國之政皆參預焉從平并鄴以功進上大將軍鄴國公陳將吳明徹寇呂梁徐州總管梁士彥頻戰不利退保州城明徹遂堰清水灌之列船艦於

城下詔以軌爲行軍總管率諸軍赴救軌潛於清水入灌口多豎大木用鐵鎖貫車輪橫截水流以斷其船路方欲密決堰明徹破堰遽退冀乘決水以入淮比至清口川流已闊水勢亦衰船竝礙於車輪不復得過軌率兵圍而蹙之明徹及將士三萬餘人并器械輜重竝就俘獲陳之銳卒於是殲焉進柱國拜徐州總管軌性嚴重善謀略兼有呂梁之捷威振敵境陳人甚憚之宣帝征吐谷渾軌從軍中進取皆委軌軍還言宮尹鄭譯王端之罪武帝大怒除譯等名軌又嘗侍坐言東朝多涼德恐不了陛下家事後因內宴上壽又將武帝嬪曰可愛好老公但恨後嗣弱耳武帝深以爲然及宣帝卽位鄭譯等復爲近侍軌自知必及於禍謂所親曰吾昔在先朝實中社稷至計今日之事斷可知矣此州控帶淮南鄰接

疆寇欲爲身計易同反掌但忠義之節不可虧違況荷先帝厚恩每思以死自効豈以獲罪於嗣主便欲背德於先帝止可於此待死義不爲他計冀千載後知吾此心大象元年使內史杜虔信就徐州殺軌御正中大夫顏之儀切諫不納遂害之軌立朝忠恕兼有大功天下知與不知皆傷情焉

王雄字雄壺布頭太原人父崙追贈柱國大將軍少傅安康郡公雄儀貌魁梧少有謀略魏末從賀拔岳入關除金紫光祿大夫孝武西遷封臨真縣伯大統中進武威郡公累遷大將軍行同州事恭帝元年賜姓可頻氏周初授少傅進柱國大將軍武成初進庸國公邑萬戶出爲涇州總管保定四年從晉公護東征至芒山與齊斛律明月戰退走左右皆散矢又盡唯餘一奴一矢在焉雄按稍不及明月者文餘曰惜爾

不殺但生將爾見天子明月又射雄中額抱馬走至營卒贈使持節太保同華等二十州諸軍事同州刺史諡曰忠

王謙字敬萬雄子性恭謹以父功封安樂縣伯保定二年又同封武威郡公雄卒朝議以謙父殞行陣特加殊寵授柱國大將軍襲庸國公建德五年東征謙力戰進上柱國六年授益州總管十八州諸軍事隋文帝輔政會梁睿爲益州總管謙以父子受國恩將圖匡復遂舉兵署置官司隆州刺史高阿那肱爲謙畫三策曰公親率精銳直指散開蜀人知公有勤王之節必當各思効命此上策也出兵梁漢以願望天下此中策也坐守劍南發兵自衛此下策也謙參用其中下之策遣兵鎮始州隋文帝卽以睿爲行軍元帥發利鳳文秦成諸州兵擊之謙衆號十萬盡銳攻利州總管豆盧勣拒戰將

四旬遠矣基等諸軍聞睿將至衆遂潰符子英攻巴州又爲刺史呂珍所破睿縱兵深入謙自率衆逆戰左右軍皆叛謙奔新都縣令王寶執而斬之阿那肱尋被害以上太敬元約河東蒲坂人父珍絳州刺史元約性貞正有識學位至布憲大夫

薛善字仲良河東汾陰人父和南青州刺史善少爲司空府參軍再遷鹽池都將孝武西遷改河東爲秦州以善爲別駕善家素富兄元信仗氣豪侈而善獨恭已率素愛樂閑靜大統三年齊神武留善族兄崇禮守河東西魏遣李弼圍之崇禮固守善密說之猶不決會善從弟馥妹丈高子信爲防城都督守城南而善令弟濟將門生數十人與信馥等斬關引弼軍入時預謀者竝賞五等爵善與弟愼固辭周文嘉之以

爲汾陰令善幹用強明一郡稱最太守王耀美之令兼督六縣事尋爲行臺郎中除司農少卿領同州夏陽縣二十屯監又爲夏陽鐵冶監督課八千人兼加慰撫甲兵精利而皆忘其苦焉遷大丞相府從事中郎追論屯田功賜爵龍門縣子遷黃門侍郎除河東郡守進驃騎大將軍開府儀同三司賜姓宇文氏六官建拜工部中大夫進博平縣公再遷戶部中大夫晉公護以善白齊軌語引爲中外府司馬遷司會中大夫副總六府事加授京兆尹仍行司會出爲隆州刺史兼益州總管府長史徵拜武威少府卒贈三州刺史謚繆子褒嗣官至高陽郡守

薛端字仁直河東汾陰人英集子有志操父喪合禮與弟裕勵精篤學不交人事年十七司空高乾卽辟參軍賜爵平陰

別棄官歸鄉里。周文帝令大都督薛崇禮據龍門引端同行。崇禮降東魏。東魏遣行臺薛修義督乙干貴西據楊氏壁。端先在壁中修義令兵逼端等。東度方欲濟河。會日暮。端密與宗族及家僮等潛逸。修義遣騎追端。且戰且馳。遂入石城柵。并力固守。貴等拔還河東。東魏又遣其將賀蘭懿南汾州刺史薛琰達守楊氏壁。端率其屬竝招喻村人多。設奇兵以臨之。懿等疑有大軍。東遁。赴船溺死者數千人。端收其器械復還楊氏壁。周文帝遣南汾州刺史周景恕鎮之。降書勞問。徵赴闕。以爲大丞相府戶曹參軍。從擒竇泰。復宏農。戰沙苑。竝有功。進伯。後改封交城縣伯。累遷吏部郎中。端性強直。不遵權貴。故賜名端。自居選曹。先盡賢能。雖貴游子弟。才劣行薄者。未嘗升擢之。每啟云。設官分職。本康時務。苟非其人。不如

曠職文帝深然之大統十六年東討李弼爲別道元帥妙簡
英察文帝曰爲公思得一長史無過薛端弼對曰眞才也乃
遣之轉尙書右丞仍掌選事魏主廢有勸文帝踐極者端以
爲三方未一遽正名號示天下以不廣請待龜弱僭僞然後
俯順樂推文帝撫端背曰成我者卿也遂脫所著冠帶袍袴
竝賜之進授吏部尙書賜姓宇文氏端雅有人倫鑒擢用咸
得其才六官建拜軍司馬加侍中驃騎大將軍開府儀同三
司進爵侯周受禪再遷戶部中大夫進爵公孝閔之廢端頗
具同異晉公護不悅出爲蔡州刺史爲政寬惠人吏愛之轉
基州刺史蔡州父老請留端者千餘人至基州未幾卒遺誡
薄葬勿受府州贈遺贈本官加大將軍進封文城郡公諡曰
質子冑嗣

樂遜字遵賢河東猗氏人從徐遵明受孝經喪服論語詩書禮易左氏春秋大義大統七年除子都督九年太尉李弼請教授諸子既而相府戶曹柳敏行臺郎中盧光河東郡丞辛粲相繼舉遜稱有牧人之才弼請留不遣魏廢帝二年周文令教授諸子在館六年與諸儒分授經業講孝經論語毛詩及服氏春秋左氏傳周初除秋官府上士轉師氏下大夫自譙王儉以下並行弟子之禮遜以經術教授訓導有方衛公直鎮蒲州爲主簿武成元年六月霖雨陳時宜十四條其五條曰崇教化省造作明選舉重戰法禁奢侈皆切於時務保定二年遷遜伯中大夫五年詔魯公斌畢公賢等俱受業天和元年岐州刺史陳公純舉遜賢良五年上表致仕優詔不許賜以粟帛及錢授湖州刺史封安邑縣子人多繼左未習

儒風遜勸勵生徒加以課試數年化洽州境蠻俗子多異居
每加勸導還朝拜皇太子諫議復在露門教授皇子大象初
進崇業郡公又爲露門博士二年進開府儀同大將軍出爲
汾陰郡守固辭改授東揚州刺史仍賜安車衣服奴婢又於
本郡賜田十頃儒者以爲榮隋開皇元帝卒於家年八十二
遜寡交遊立身以忠信爲本不自矜尙著孝經論語毛詩左
氏春秋序論十餘篇又著春秋序義通賈服說發杜氏達辭
理並可觀

以上蒲
州府

于謹字思敬代人栗磳六世孫沈深有識量略窺經史尤好
孫子兵書屏居未有仕進志或勸之謹曰州郡之職昔人所
鄙台鼎之位須待時來太宰元天穆見之歎曰王佐材也及
破六韓拔陵引蠕蠕爲援大行臺元纂討之夙聞謹名辟鎧

曹參軍事從軍北伐蠕蠕出塞謹追之前後十七戰盡降其
衆正光四年行臺廣陽王元深北伐引爲長流參軍遂與廣
陽破賊悉收西部鐵勒也列河之衆孝昌元年又隨廣陽王
征鮮于修禮軍次白斗牛遲停軍中山侍中元晏譖廣陽於
靈太后且曰于謹智略過人爲其謀主詔立榜募獲謹者重
賞謹聞之請詣闕披露腹心廣陽許之謹遂到榜下曰吾知
此人衆共詰之謹曰我卽是也有司以聞靈太后見之大怒
謹備述廣陽忠款兼陳停軍狀遂捨之後從爾朱天光戰韓
陵天光敗遂入關周文帝以謹爲夏州防城大都督兼夏州
長史及賀拔岳被害謹言於周文曰關中秦漢舊都古稱天
府今若據其要害招集英雄足觀時變且車駕在洛逼迫羣
凶若請都關右挾天子而令諸侯千載一時也周文大悅會

有敕追謚爲關內大都督謹因進都關中策魏帝西遷從周
文征潼關破回洛城授北雍州刺史進爵藍田縣公大統三
年東伐爲前鋒進拔宏農擒東魏陝州刺史李徽伯齊神武
至沙苑謹力戰進爵常山郡公又從戰河橋拜大丞相府長
史兼大行臺尙書再遷太子太保芒山之戰大軍不利謹率
麾下僞降立於路左神武乘勝逐北不以爲虞謹自後擊之
敵大駭軍亂以此大軍得全十二年拜尙書左僕射領司農
卿侯景款附謹諫以爲景情難測周文不聽尋兼大行臺尙
書大丞相長史鎮潼關加授華州刺史俄拜司空恭帝元年
除雍州刺史命出攻梁元帝於江陵周文餞於青泥谷謹令
中山公護及大將軍楊忠等先據江津斷其走路梁人樹木
柵於外城廣輪六十里謹悉衆圍之旬有六日外城遂陷梁

主退保子城翌日率其太子以下面縛出降尋殺之虜其男女十餘萬人收其府庫珍寶得宋渾天儀梁日晷銅表魏相風烏銅蟠螭趺大玉徑四尺圍七尺及諸輿輦法物以獻軍無私焉立蕭管爲梁主振旅而旋周文親至其第宴語極歡賞奴婢一千口及梁寶物并金石絲竹樂一部別封新野郡公固辭不許又令司樂作常山公平梁歌十首使工人歌之謹白以功名旣立願保優閑乃上駿馬及鎧甲周文識其意曰今巨猾未平公豈得便爾獨善不受六官建拜大司寇及中山公謹受顧命而名位素下羣公多圖執政謹旣周文等夷護每申禮敬至是謹乃起曰公若統理軍國謹等便有所依遂再拜羣公迫於謹亦拜衆議始定孝閔踐祚進封燕國公邑萬戶遷太傅大宗伯與李弼侯莫陳崇等參議朝政賀

蘭祥討吐谷渾明帝令謹遙統其軍授以方略保定二年乞骸骨優詔不許三年以謹爲三老固辭又不許賜延年杖武帝幸太學以食之及晉公護東伐謹時有病護以其宿將舊臣請與同行詢訪戎略軍還賜鐘磬一部天和二年又賜安車一乘尋授雍州牧三年卒年七十六武帝親臨詔譙王儉監護喪事賜緡千段粟麥千斛贈本官加使持節太師雍恆等二十州諸軍事雍州刺史謚曰文及葬王公以下咸送郊外配享文帝廟庭謹有智謀善事上名位雖重愈存謙挹每朝參往來不過兩三騎朝廷軍國務多與謹決謹亦竭其智能故功臣中特見委信始終若一人無間言每誡諸子務存靜退子孫繁衍皆至顯達當時莫比

梁椿字千年代人從尒朱榮入洛又從賀拔岳討平万俟醯

奴仍從周文平侯莫陳悅大統中以戰功封東平郡公位開
府儀同三司周孝閔踐阼除華州刺史改封清陵郡公保定
元年拜大將軍卒於位贈都督恆州刺史諡曰烈椿性果毅
善於撫納所獲寶物分賜麾下每踐敵場咸得其死力雅好
儉素不營貲產子明以椿功賜爵豐陽縣公襲椿爵舊封回
授弟昀

伊婁穆字奴干代人父靈善騎射爲周文所知嘗謂之曰伊
升阿衡於殷致主堯舜卿旣姓伊庶卿不替前緒賜名尹歷
衛將軍隆州刺史盧奴縣公穆弱寇爲周文帳內親信以機
辯見知歷中書舍人通直散騎常侍常入白事周文望見悅
之字之曰奴干作儀同而見我矣於是拜儀同三司賜封安
陽縣伯周孝閔踐阼進位驃騎大將軍建德中卒

趙昶字長舒天水南安人會祖襄仕魏至中山太守因家於代昶弱冠以材力聞魏北中郎將高干鎮陝以昶爲長史中軍都督屬太相平宏農擢爲相府典籤清水氏作亂遣昶諭降之汾州胡叛再遣昶慰勞之皆知其虛實及大軍往討昶爲先驅遂破之封章武縣伯拜安夷郡守帶長蛇鎮將氏俗荒獷昶威懷以禮莫不悅服加授帥都督誘斬叛氏除大都督行南泰州事時氏帥蓋鬧等反復討禽之又與史甯破宕昌羌獠二十餘萬拜武州刺史恭帝初加驃騎大將軍開府儀同三司討平潭水羌及鳳州興州叛賊昶屢爲將帥傾心下士虜獲氏羌撫而使之皆爲昶盡力太祖常曰不煩國家士賜而能威服氏羌者趙昶有之矣周明帝錄前後功進爵長道郡公賜姓宇文氏二年徵拜資部中大夫行吏部辛

達奚武字成興代人祖眷父長並爲鎮將武少倜儻好馳射
賀拔岳引爲別將及岳爲侯莫陳悅所害與趙貴同朝戴周
文帝從平悅封須昌縣伯大統初自大丞相府中兵參軍出
爲東秦州刺史齊神武與寶泰高敖曹三道來侵周文欲并
兵擊秦諸將多異議唯武及蘇綽意同遂擒之周文進圖宏
農遣武從兩騎覘候武與其候騎遇卽交戰斬六級獲三人
而反齊神武趣沙苑周文復遣武覘之武從三騎皆衣敵人
衣至暮下馬潛聽其軍號厯營若警夜者或有不如法往往
撻之具知敵情以告遂從破之進高陽郡公四年周文援洛
陽武爲前鋒破莫多婁貸文又進至河橋力戰斬其司徒高
敖曹再遷雍州刺史復從戰芒山時周軍不利齊神武乘勝
至陝武禦之乃退七年詔武經略漢川梁梁州刺史宜豐侯

蕭修固守南鄭武圍之修請服會梁將楊乾運救修修更不下武擊走乾運修乃降自劍門以北悉平明年振旅還朝議欲以武爲柱國武曰我作柱國不應在元子孝前固辭以大將軍出鎮玉壁周初授柱國大司寇齊豫州刺史司馬洸難來附詔迎之以歸武成初轉大宗伯進鄭國公齊將斛律敦侵汾絳武禦之敦退武築柏壁城留開府權嚴薛羽生守之保定三年遷太保周軍東伐隋公楊忠引突厥自北道武以三萬騎自東期會晉陽武至平陽後期不進而忠已還乃班師出爲同州刺史明年從晉公護東伐時尉遲迴圖洛陽爲敵所敗武於芒山禦之至夜收軍齊王憲欲待明更戰武曰洛陽軍散人情駭動不因夜速還明日欲歸不得矣遂全軍而返天和三年轉太傅武居重位不持威儀行常單馬左右

從一兩人門外不施戟或言其輕率武曰吾昔在布衣豈望富貴今日富貴不可頓忘疇昔且天下未平國恩不報安可過事威容乎武在同州時旱敕祀華岳岳廟舊在山下常所祈禱武曰吾備位三公不能變理陰陽不可同於衆人在常祀所必須登峰展誠尋其聖奧時武年逾六十攀藤而上稽首祈請晚卽於岳上藉草而宿夢白衣執武手曰快辛苦甚相嘉尙武驚覺至旦雲霧四起俄而澍雨武帝璽書勞之賜綵百匹卒贈太傅十五州諸軍事同州刺史諡曰桓

達奚震字猛略武子少驍勇走及奔馬周文嘗渭北校獵時有兔過震射之馬倒而震足不傾蹶因步走一發中兔馬纔起遂回身騰上周文喜曰非此父不生此子賜雜綵一百段後封魏昌縣公明帝初拜司右中大夫加驃騎大將軍開府

上卷之二
儀同三司武成初進廣平郡公除華州刺史頗有政術天和
三年拜柱國建德初襲鄭國公從平鄴拜太宗伯震父嘗爲
此職時論榮之宣政中出爲原州總管隋開皇初卒於家
達奚基武子大象末益州刺史與王謙起兵被害

庫狄峙本段匹禪之後徙居代祖凌武威郡守父正上洛郡
守峙少以宏厚知名善騎射有謀略仕魏高陽郡守政存仁
恕百姓悅之孝武西遷棄官從入關大統元年拜中書舍人
參掌機密以恭謹見稱遷黃門侍郎朝議欲結和蠕蠕使峙
往峙容貌魁梧善於辭令蠕蠕主雅信重之自是不復爲寇
周文曰昔魏絳和戎見稱前史以君方之彼有愧色封高昌
縣公累遷驃騎將軍開府儀同三司拜侍中蠕蠕滅後突厥
強盛雖與周通好而外連齊氏周文又令峙銜令喻之突厥

卽執齊使來歸進安豐郡公歷小司空小司寇明帝初爲益州刺史都督三十一州諸軍事時性寬和尚清靜爲夷獠所突後爲宜州刺史入爲少師乞致政詔許之卒諡曰定子嶷嗣少知名位開府儀同三司職方中大夫蔡州刺史卒嶷弟徽從平齊拜儀同大將軍賜爵樂陵縣公徽弟徽亦以軍功主儀同大將軍保城縣男徽弟欽性宏厚以齊右下大夫從武帝東伐入并州軍敗侍臣殲焉及帝之出唯欽侍從以功授上儀同大將軍遷開府歷右宮伯賜爵樂城縣侯仕隋至戶部尙書

尉遲迴字薄居羅代人父俟兜尙周文帝姊昌樂大長公主武成初追贈柱國大將軍太傅長樂郡公諡定迴少聰敏美容儀及長有大志好施愛士尙魏文帝女金明公主拜駙馬

都尉封西都侯大統十一年拜侍中驃騎大將軍開府儀同
三司進魏安郡公十五年遷尙書左僕射兼領軍將軍周文
深委仗之十六年拜大將軍梁武陵王紀在蜀率衆東下梁
元帝請救周文曰蜀可圖矣取蜀制梁在茲一舉諸將多有
異同唯迴以爲紀盡銳東下蜀地空虛伐之必有征無戰周
文曰伐蜀之事一以委汝於是令迴督開府元珍乙弗亞侯
呂陵始叱奴興綦連雄宇文昇等六軍取晉壽開平林舊送
前軍臨劔閣紀安州刺史樂廣降紀梁州刺史楊乾運已送
誠款而猶據潼水遣元珍侯呂陵始等襲之乾運還保潼川
珍等圍之乾運降遂渡涪江至竹溪時夏中連雨山路險峻
迴親勞問將士進軍圍紀益州刺史蕭攜紀前南梁州刺史
史欣景幽州刺史趙拔扈等爲援迴分遣元珍乙弗亞

擊破之拔扈迺走欣景降馮被圍五旬戰頻敗乞降許之乃與紀子宜都王圓肅率其文武詣軍門請見迺以禮接之號令嚴肅軍無私焉詔以爲大都督益潼等十二州諸軍事益州刺史三年加督六州以平蜀功封一子安固郡公自劍閣以南得承制封拜及黜陟迺明賞罰布恩威綏輯新邦經略未附夷人懷而歸之性至孝時大長公主年高多病周文知其至性徵入朝以慰其母意仍賜迺裘冕之服蜀人思之爲立碑頌德拜小宗伯周初進柱國大將軍取霍去病冠軍之義改封甯蜀公遷大司馬尋鎮隴右武成元年進蜀國公邑萬戶除秦州總管秦渭等十四州諸軍事隴右大都督保定二年拜大司馬從晉公護攻洛陽齊王憲等軍於芒山齊衆渡河諸軍驚散迺率麾下反行卻敵諸將乃得全師而還遷

太保太傅建德初拜太師加上柱國宣帝初爲大右弼轉大前疑出爲相州總管隋文帝輔政令迥子魏安郡公惇以會葬徵迥尋令鄖國公韋孝寬代爲總管迥謀舉兵留惇不受代遂殺長史晉和集文武士庶登城北樓而令之衆咸從命乃自稱大總管承制署官司奉趙王招少子以號令迥弟子勤時爲青州總管亦從迥迥所管相衛黎毛洺貝趙冀瀛滄勤所統青齊膠光莒諸州皆從之衆數十萬榮州刺史宇文胄中州刺史李惠東楚州刺史費也利進國東潼州刺史曹孝達各據州以應迥徐州總管司錄席毗前東平郡守畢義緒據兗州及徐州之蘭陵郡亦以應迥永橋鎮將紇豆陵惠以城降迥迥又北結高寶甯以通突厥南連陳人隋文帝以韋孝寬爲元帥攻之迥遣石遜攻建州刺史宇文弁以州降

邇又遣韓長業攻陷潞州執刺史趙威署城人郭子勝爲刺史赫連士猷攻晉州卽據小鄉城紇豆陵惠襲陷定州之鉅鹿郡遂圍恆州宇文威攻汴州烏丸尼尉遲偁率膠光青齊莒兗之衆圍沂州檀讓攻陷曹毫二州屯兵梁郡東南道行臺席毗衆號八萬軍於藩城攻陷昌應下邑豐縣李惠自中州攻永州焚之而還宇文胄軍於洛口梁子康攻懷州魏安公惇率衆十萬人入武德軍於沁東孝寬等諸軍隔水相持不進隋文帝又遣高穎馳驛督戰惇兵布二十餘里麾軍少卻欲待孝寬軍半渡而擊之孝寬因其卻乃鳴鼓齊進惇遂大敗孝寬進至鄴邇與其子惇祐等又悉卒十三萬陣於城南勤率衆五萬自青州來赴麾下兵皆力戰孝寬軍失利而卻鄴中士女觀者如堵高穎與李詢完犯觀者因其擾而乘

之迴衆大敗遂入鄴走保北城孝寬縱兵圍之李詢以其屬
先登迴上樓射殺數人乃自殺勸惇祐等東走青州未至開
府郭衍追獲之迴自起兵至於敗凡經六十八日子誼開府
資中郡公誼弟寬大將軍長樂郡公先卒寬弟順授開府安
固郡公後以女爲宣帝皇后拜上柱國封胙國公順弟惇軍
正下大夫魏安郡公惇弟祐西都郡公皆被害而誼等諸子
以年幼並獲全武德中許改葬

尉遲綱字婆羅少與兄迴依舅氏周文帝入關迴綱與母昌
樂大長公主留晉陽後方入關常陪侍帷幄出入臥內以軍
功封廣宗縣伯綱驍果有膂力善騎射周文委以心膂河橋
之戰周文馬中流矢綱與李穆等左右力戰文帝方得乘馬
大統十四年進平昌郡公廢帝二年拜大將軍兼領軍及立

齊王仍爲中領軍總宿衛事廼伐蜀綱從周文送於城西周
文命射走兔誓曰若獲此兔必當破蜀俄綱獲兔而返又嘗
從狩雲陽見五鹿俱走綱獲其三周初掌禁兵除小司馬明
帝初進柱國大將軍武成元年進吳國公邑萬戶除涇州總
管歷少傅大司空陝州總管晉公護東伐留鎮京師軍還復
歸鎮天和二年以政績可紀賜帛及錢穀增邑以褒賞之阿
史那后入塞詔綱率衆迎衛三年追論河橋功封一子縣公
四年卒贈太保諡曰武

尉遲運綱長子少彊濟志在立功魏大統十六年以父勲封
安喜縣侯周明帝立以定策勳進周城縣公歷隴州刺史還
左武伯中大夫尋加軍司馬職兼文武甚見委任進廣業郡
公轉右司衛時選忠諒願正者匡弼東宮以運爲右宮正建

德三年帝幸雲陽宮又令兼司武與長孫覽輔皇太子居守衛刺王直率其黨襲肅章門覽懼走運時偶在門中直兵奄至不暇命左右手自闔門直黨與運爭門斫傷運指僅而得閉直既不得入乃縱火運恐火盡直黨得進取宮中材木及牀以益火用膏油灌之火轉熾久之直不得進乃退運率留守兵因其退擊之直敗走是夜徵運宮中已不守矣武帝嘉之授大將軍四年出爲同州刺史同州蒲津潼關等六防諸軍事帝伐齊召運參議五年拜柱國進盧國公轉司武上大扶總宿衛軍事及雲陽宮祕喪未發運總侍衛兵還京師宣帝初授上柱國運爲宮正時嘗進諫又與王軌宇文孝伯等皆爲武帝親待軌被害出爲秦州總管以憂卒贈大後丞七州諸軍事秦州刺史謚曰忠子靖嗣運弟勤大象末青州總

府
管起兵應迴勤弟敬尙明帝女河南公主位儀同三司以土

柳敏字白澤河東解人晉太常純七世孫父懿魏車騎大將軍儀同三司汾州刺史敏九歲而孤事母以孝聞性好學涉獵經史陰陽卜筮之術靡不習焉年未弱冠起家員外散騎侍郎累遷河東郡丞朝議以敏本邑故授之敏處物平允甚得時譽周文克復河東見而器之曰今日不喜得河東喜得卿也拜丞相府參軍事轉戶曹參軍兼記室每有四方賓客恆令接之吉凶禮儀亦令監綜又與蘇綽等修撰新制遷禮部郎中封武成縣子加帥都督領本鄉兵俄進大都督母憂旬日間鬚髮半白尋起吏部郎中毀瘠過禮杖而後起周文歎異之特加賞賜尉遲迴伐蜀爲行軍司馬軍中籌略並委

之益州平進驃騎大將軍開府儀同三司加侍中遷尙書賜
姓宇文氏拜禮部中大夫周初進爵公又除河東郡守復徵
拜禮部出爲郢州刺史甚得物情及將還朝夷夏士人並齎
酒餽物產候於路敏從他道而還復拜禮部敏操履方正性
又恭勤朝必夙興待旦又久處臺閣明練故事近儀或乖者
皆案據舊章刊正取中遷小宗伯監修國史轉小司馬又監
修律令進大將軍出爲鄜州刺史以疾不之部進武德郡公
武帝及宣帝並親幸其第間疾隋開皇元年卒

柳慶字更興河東解人幼聰敏有器量博涉羣書不爲章句
年十三父僧習試令誦賦一篇千餘言立讀三遍便誦之無
所漏時僧習爲潁川郡守將選鄉官貴勢競來請託拒之而
其使侯荅慶具書草僧習讀嘆曰此兒有意氣丈夫理當如

是卽依所草以報起家奉朝請慶出後第四叔及父喪議者
不許服重慶泣曰禮緣人情若於出後之家更有苴斬之服
可奪此以從彼今四叔薨背已久情事不迫豈容奪禮乖違
天性遂以苦由終喪旣葬負土成墳孝武將西遷慶以散騎
侍郎馳傳入關至高平見周文共論時事周文請迎輿駕令
慶復命帝欲往荊州慶曰關中金城千里天下之彊國也荊
州地無要害甯足以固鴻基帝納之及西遷以母老不從獨
孤信鎮洛陽乃得入關除相府東閣祭酒大統十年除尙書
都兵郎中并領記室時北雍州獻白鹿羣臣欲賀尙書蘇綽
謂慶曰近代已來文章華靡江左彌復輕薄洛陽後進祖述
未已言職典文房宜製此表以革前弊慶操筆立成辭兼文
質綽讀而笑曰枳橘猶自可移況才子也尋領雍州別駕廣

陵王欣甥孟氏屢爲凶橫或告其盜牛慶捕得寔趣令就禁
孟氏益驕慶大集僚吏盛言孟氏倚權侵虐狀言畢令笞殺
之貴戚斂手賈人持金二十斤詣京寄人居止常自執管鑰
而竝失之主人自誣服慶疑之召問賈人曰頗與人同宿飲
乎曰日者曾與一沙門再宴醉而盡寢慶曰沙門乃眞盜耳
卽遣捕之盡獲所失金十二年爲計部郎中別駕如故有胡
家被劫郡縣按察莫知賊所隣近多被囚慶作匿名書多榜
官門曰若聽先首免罪便欲來告慶乃施免罪之牒居二日
廣陵王欣家奴面縛自告牒下因盡獲黨與慶之守正明察
皆此類也每歎曰昔于公斷獄無私閭高門以待封僞斯官
有驗吾其庶幾乎封清河縣男除仙書左丞攝計部周文嘗
怒安定國臣王茂將殺之而非其罪朝臣莫敢諫慶進爭之

周文愈怒曰卿亦須坐之執慶於前慶辭氣不撓抗聲曰慶
雖愚誠寔不敢愛死但懼公爲不明之君耳周文乃悟而
赦茂已不及矣明日謂慶曰吾不用卿言遂令王茂寃死可
賜茂宗錢帛以旌吾過尋進爵爲子慶威儀端肅樞機明辨
每發號令常使宣之天性亢直無所回避周文深委仗焉恭
帝初進驃騎大將軍開府儀同三司尙書右僕射轉左僕射
領著作又拜司會中大夫周初賜姓宇文氏進平齊縣公晉
公護欲引爲腹心慶辭之又與楊寬有隙遂見疏忌出爲萬
州刺史明帝留爲雍州別駕領京兆尹武成二年除宜州刺
史寬囚慶故吏求司會時罪失案陰積六十餘日吏或死於
獄終無所言唯得乘錦數匹時人服其廉慎又入爲司會兄
子雄亮刃仇人黃衆寶晉公護護慶擅殺人對曰慶聞父母

之讐不同天昆弟之讐不同國明公以孝臨天下何責於此乎護愈怒慶辭色無屈竟免卒贈鄜綬丹三州刺史諡曰景平機嗣

柳帶韋字孝孫慶從子也父鷺好學善屬文卒於魏臨淮王記室參軍事帶韋少好學深沈有度量身長八尺三寸美風儀善占對周文辟參軍事令使梁邵陵南平二王行至安州過段寶等反矯爲周文書以安之竝卽降附及見邵陵具申周意邵陵遣使隨報命授輔國將軍中散大夫後爲行臺左丞從達奚武南討梁宜豐侯蕭修守南鄭武攻之未拔令入城說修降之廢帝元年出爲解縣令加驃騎將軍左光祿大夫轉汾陰令發擿姦伏百姓畏而懷之周武成元年授武藏下大夫天和二年封康成縣男累遷兵部中大夫仍領武藏

五年轉武藏中大夫俄遷驃騎大將軍開府儀同三司凡居
劇職十有餘年處斷無滯官曹清肅爲益州總管譙王儉府
長史領益州刺史漢王贊別駕總知軍事及東討徵爲前軍
總管齊王憲府長史以功授上開府儀同大將軍進爵公又
爲并州司會并州總管陳王純府長史卒諡曰愷子祚嗣少
有名譽位宣納上士入隋爲司勳侍郎

柳遐字子昇河東解人宋太尉元景從孫祖叔珍義陽內史
父季遠梁宜都太守遐幼而爽邁神彩疑然髫歲便有成人
之量篤好文學動合規矩世父慶遠特器之梁西昌侯蕭藻
鎮雍州遐時年十二修謁風儀端肅進止詳雅藻羨之試遣
左右踐遐衣裾遐徐步稍前曾不顧盼仕梁尙書功論郎謝
舉時爲僕射與語嘉之曰江漢英靈見於此矣岳陽王蕭簪

承制授吏部郎賜爵開喜公尋進持節侍中驃騎大將軍開
府儀同三司及督踐位於江陵以襄陽歸周辭答曰陛下中
興鼎業龍飛舊禁臣昔因幸會早奉名節理當以身許國期
之始終自晉氏南遷臣宗族蓋寡從祖太尉世父儀同從父
司空竝以位望隆重遂家於金陵唯留先臣獨守墳柏嘗誠
臣等使不違此志今襄陽旣入北朝臣若陪隨鑾蹕進則無
益塵露退則有虧先旨督重違其志遂許之因留鄉里以經
籍自娛周時頻徵固辭以疾及督殂舉哀行舊臣之服保定
中又徵之始入朝授驃騎大將軍開府儀同三司霍州刺史
導人務先以德不用命者乃微加貶其下威而化之曰我君
仁惠其可欺乎卒贈金安二州刺史遇初爲州主簿父卒於
揚州自襄陽奔赴六日而至哀感行路後奉喪西歸中流風

起遐抱棺號慟俄頃風止母嘗乳間發疔醫云此疾無可救
理惟得人吮膿或望微止其痛遐應聲即吮旬日遂瘳咸以
爲孝感性溫裕略無喜愠未嘗論人之短尤尙施予家無餘
財十子靖莊最知名

柳靖字思休遐子少方雅博覽墳籍入周授大都督歷河南
廣德二郡所居皆有政術吏人畏而愛之然性愛閑素於名
利辭如也及秩滿還鄉便有終焉之志隋文帝特詔徵之以
疾固辭閉門自守足不歷園庭殆將十載子弟奉之若嚴君
焉其有過者靖必下帷自責長幼相率拜謝然後見之助以
禮法鄉里亦慕而化之或有不善者皆曰惟恐柳廣德知也
時諭方之王烈前後總管到官皆親問疾遂以爲故事秦王
俊臨州賚以几杖並致衣物靖唯受几杖餘並固辭其爲常

時所重如此隋開皇中卒

以上解州

裴寬字長寬河東聞喜人祖德歡魏中書侍郎河內郡守父靜慮銀青光祿大夫贈汾州刺史寬儀貌瓌偉博涉羣書弱冠爲州里所稱撫諸弟以篤友聞榮陽鄭孝穆嘗謂從弟文直曰裴長寬兄弟天倫篤睦人之師表吾愛之重之汝可與之游處年十三選孝明挽郎釋褐員外散騎侍郎孝武西遷寬謂諸弟曰君臣逆順大義昭然理無東面以虧臣節乃避難大石嶺獨孤信鎮洛陽始出見馮章子爽在洛窘急投寬寬聞懷納之信知而詰責寬曰窮來見歸義無執送今日獲罪是所甘心經赦得不坐大統五年授都督同軌防長史加征虜將軍十三年從防主韋法保向潁川解侯景圖謂法保曰侯景狡猾必不肯入關若伏兵斬之亦一時之功也不然

類深加嚴警不得信其誑誘自貽後悔法保乃加警十四年
興東魏將彭樂樂恂戰新城被擒見齊文襄寬止舉詳雅善
占對文襄甚賞異之厚加禮遇寬乃裁所臥種夜維而出因
得遁還周文帝曰披堅執銳或有其人疾風勁草歲寒方驗
裴長寬爲高澄厚遇乃能冒死歸我雖竹帛所載何以加之
乃手書署寬名下授持節帥都督封夏陽縣男卽除孔城城
主十六年遷河南郡守仍鎮孔城進使持節車騎大將軍儀
同三司散騎常侍周初進爵子寬在孔城十三年與齊洛州
刺史獨孤永業相對永業有計謀多譎詐寬每揣知其情邀
擊無不剋天和三年除溫州刺史復以沔州接敵境移寬爲
刺史陳將程靈洗攻之力屈城陷執至揚州卒於江左子義
宣後使陳始得還柩隋開皇元年贈襄郢二州刺史義宣位

司金二命士合江令

裴果字戒昭河東聞喜人祖思賢魏青州刺史父遵齊州刺史果少慷慨有志略魏太昌中爲陽平郡丞周文帝使并州與果遇果知非常人密託附焉永安末從軍征討乘黃驄馬衣青袍每先登陷陣時人號爲黃驄少年永熙中授河北郡守沙苑敗率宗黨歸闕周文嘉之賜田宅奴婢牛馬什物從戰河橋解玉壁圍摧鋒奮擊所向披靡大統九年從戰芒山陷陣擒東魏都督賀婁焉邏蘭勇冠當時衆人莫不歎服周文愈親待之補帳內都督遷帥都督平東將軍後從開府楊忠平隋安陸以功加大都督除正平郡守正平果本郡也以威猛爲政百姓畏之盜賊屏息遷司農卿又從尉遲迥伐蜀爲前軍開劍閣破季慶保降楊乾運皆有功廢帝三年授龍

州刺史封冠軍縣侯俄而州人張遁李拓驅百姓圍州城果
設方略以拒之賊退走出兵追擊累戰破之旬日間州境清
晏轉陵州刺史周初除隆州刺史加持節驃騎大將軍開府
儀同三司進公厯眉復二州刺史果性嚴猛能斷決抑挫豪
石中理屈滯厯牧數州號爲稱職卒贈本官加絳晉建州刺
史謚曰質子孝仁嗣孝仁幼聰敏涉獵經史有譽於時起家
舍人上士累遷長甯鎮將扞禦齊人有威略厯建譙毫三州
刺史

裴俠字嵩和河東人祖思齊舉秀才拜議郎父欣西河郡守
贈晉州刺史俠志識聰慧年十三父憂哀毀若成人州辟主
簿舉秀才魏正光中解巾奉朝請稍遷義陽郡守元顥入洛
執其使焚其敕書孝莊嘉之授東郡太守帶防城別將及孝

武徵兵使率所部赴洛陽武衛將軍王思政問之俠曰圖歡
有立至之憂西巡有將來之慮且至關右曰慎一日徐思其
宜耳思政乃進俠於上授左中郎將及西遷俠將行而妻子
猶在東郡滎陽鄭偉曰何如東就妻子徐擇木焉俠曰旣食
其祿甯以妻子易圖也遂從入關賜爵清河縣伯除丞相府
士曹參軍大統三年領鄉兵從戰沙苑先鋒陷陣俠本名協
至是周文帝曰仁者必勇因命名俠以功進侯王思政鎮玉
壁爲長史草思政報齊神武書甚壯烈周文善之曰雖魯仲
連無以加也除河北郡守躬履儉素愛人如子與諸牧守上
謁周文令清慎如俠者同立衆無敢應號獨立使君又撰九
世伯祖貞侯潛傳述裴氏清公宗室中知名者咸付一通從
弟伯鸞世彥時竝爲丞相府佐笑曰人生仕進須聲名竝裕

清苦若此竟欲何爲俠曰夫清者莅職之本儉者持身之基
況我大宗世濟其美故能存見稱於朝廷沒流芳於典策今
吾濫蒙殊遇固其窮困非慕名也志在自修懼辱先也伯鳳
等慚而退再遷郢州刺史加儀同三司梁竟陵守孫騰鄧城
守張建竝以郡來附俠密謂人曰爲曰動言肆且輕於去就
建神情審定當無異心乃馳啟其狀周文曰裴俠有鑒深得
之矣鄧城竟不遣監統歸還以郢叛卒如俠言轉大將軍拓
州刺史徵拜雍州別駕周初除司邑下大夫加驃騎大將軍
開府儀同三司進公遷戶部中大夫奸吏隱沒或至千萬勵
精發擿數旬內奸盜略盡轉工部中大夫掌錢物典李貴悲
泣或問之對曰官物多費用裴公清嚴有名懼遭罪責耳俠
許其自首俠嘗遇疾沈頓忽聞五鼓便卽驚起顧左右曰可

向府所苦因此而瘳晉公護曰裴俠危篤而不廢憂公間鼓聲病遂愈豈非天祐勤恪也司空宇文貴小司空中微來候俠疾所居第屋不免霜露貴等還言之上爲起宅并賜良田十頃奴隸耕耒糧粟備足搢紳咸以爲榮卒於位贈太子少師蒲州刺史諡曰貞河北郡吏民作頌紀清德焉子祥性忠謹有理劇才少爲成都令清不及俠斷決過之後除長安令爲權貴所憚遷司倉下大夫俠終以毀卒

裴文舉聞喜人遂子少忠謹涉獵經史大統十年起家奉朝請周文帝子盛簡賓友文舉選與諸公子游雅相欽敬未嘗戲狎遷著作郎中外府參軍恭帝二年賜姓賀蘭氏周初襲爵澄城縣子齊公憲開幕府爲司錄憲出鎮劔南復爲總管府中郎武成二年就加使持節車騎大將軍儀同三司蜀土

沃饒或勸以利答曰利之爲貴莫若安身身安則道隆非貨
之謂是以不爲非惡財也憲矜其貧寒每欲資給之文舉恆
自謙遜辭多受少保定三年遷絳州刺史廉約自守一遵父
選任正平遺範百姓美而化之總管韋孝寬特相欽重每與
談論不覺膝前於席天和初進驃騎大將軍開府儀同三司
尋爲孝寬柱國府司馬六年入爲司憲中大夫進爵伯轉軍
司馬文舉與弟璣友愛璣早亡撫視遺孤逾於已子六年除
南青州刺史宣政元年卒於位子昌嗣位至大都督子神安
也通守有子知禮

以上絳州

宇文深字奴于代武川人侍中測弟也性鯁正有器局年數
歲便累石爲營布置行伍皆有軍陣之勢父永見之曰後必
爲名將孝武西遷事起倉卒深時爲子都督領宿衛兵撫循

所部並得入關以功賜爵長樂縣伯大統中累轉尙書直事
郎中齊神武屯蒲坂遣其將竇泰趨潼關高敖曹圍洛州周
文將襲泰諸將難之間策於深深曰竇氏高歡驍將仗以禦
侮今大軍就蒲坂歡守竇援內外受敵取敗道也不如選輕
銳潛出小關竇性急來戰高歡持重未卽救之竇可擒也迴
師禦歡可以制勝文帝喜曰是吾心也軍遂行果獲泰神武
亦退深又說帝取宏農剋之謂深曰君卽吾家陳平也神武
率大衆至沙苑深獨賀文帝問故曰歡撫河北甚得衆心懸
師渡河非衆所欲恥夫竇氏悅諫而來所謂忿兵一戰可擒
也尋大破齊軍果如所策進爵爲侯六官建拜小吏部下大
夫遷中大夫武成元年遷幽州刺史改封安化縣公保定初
除京兆尹入爲司會中大夫深少喪父事兄甚謹性多奇譎

好讀兵書居近侍每進籌策及在選曹頗有時譽從弟神舉
神慶幼孤深撫訓之義均同氣卒於位諡曰成康子孝伯
宇文神舉文帝族子高祖普陵會祖求男仕魏竝顯達祖金
殿兖州刺史安喜縣侯父顯和少襲爵性矜嚴頗涉經史膂
力絕人能左右馳射孝武在藩早蒙眷遇及卽位拜閣內都
督封城陽縣公定入關策遷大都督改封長廣縣公進位車
騎大將軍儀同三司散騎常侍卒神舉早孤有夙成之量及
長神情剛儼志略英贍明帝初起家中侍上士帝留意翰林
而神舉雅好篇什游幸恆從襲爵長廣縣公天和元年累遷
右宮伯中大夫進爵清河郡公建德三年自京兆尹出爲熊
州刺史齊入憚其威名尋改并州州卽齊氏別都多有姦猾
神舉示以威恩遠近悅服改封武德郡公進柱國大將軍又

改封東平郡公宣政元年轉司武上大夫討平盧昌期于范陽齊黃門侍郎盧思道亦在反中將解衣伏法神舉釋而禮之卽令草露布稽胡反寇西河與越王盛討之突厥赴救以奇兵擊走稽胡款服授并州總管武帝時神舉處心腹之任王軌字文孝伯等屢言太子之短神舉亦頗預焉宣帝卽位懼及禍懷不自安初定范陽後威聲甚振帝忌其名兼以宿憾使人齎醢酒賜之薨於馬邑時年四十八神舉美風儀善辭令博涉經史尤工騎射臨戎對寇勇而有謀莅職當官每著聲績兼好施愛士以雄豪自居故得任兼文武聲彰內外子同嗣位至儀同大將軍

趙貴字元寶天水南安人祖仁以良家子鎮武川因家焉貴少有節概尔朱榮以爲別將從討元顥有功賜爵燕樂縣子

從賀拔岳平關中累遷大都督岳爲侯莫陳悅所害貴謂其
黨曰朱伯厚王脩威意氣微恩尙能蹈履名節況吾等荷國
士之遇甯可自同衆人從五十人詣悅詐降請收葬岳悅壯
而許之還與寇洛等奔平涼首議迎周文既至以貴爲大都
督領府司馬悅平行秦州事預立魏文勳進爵爲公爲隴西
行臺討梁企定破之從復宏農沙苑進爵中山郡公芒山之
戰貴爲左軍失律坐免官尋拜柱國大將軍賜姓乙弗氏六
官建爲太保大宗伯改封南陽郡公周孝閔踐阼遷大冢宰
進封楚國公邑萬戶初貴與獨孤信等皆與文帝等夷晉公
護攝政貴自以元勳每怏怏爲護所害

韓果字阿六拔代武川人少驍雄善騎射賀拔岳引爲帳內
後從平侯莫陳悅大統初果進爵石城公果性強記兼有權

略善伺敵虛實揣知情狀有潛匿谿谷欲爲間偵者果登高望之所疑處往必有獲由是爲虞候都督常領候騎晝夜巡察略不眠寢從平寶泰又從復宏農破沙苑戰河橋並有功歷朔安二州刺史從戰芒山除河東郡守又從破稽胡於北山進兵窮討散其種落稽胡憚果勁捷號爲著翅人周文聞之笑曰著翅之名甯減飛將累遷開府儀同三司進褒中郡公保定三年拜少師進柱國天和初授華州刺史爲政寬簡吏人稱之卒子明嗣爲黎州刺史與尉遲迥同謀被害

賀蘭祥字盛樂其先與魏俱起有乞伏者爲賀蘭莫何弗因以爲氏後有以夏家子鎮武川者遂家焉父初真少知名爲鄉閭所重尙文帝姊建安長公主保定二年追贈太傅柱國常山郡公祥年十一而孤居喪合禮長於舅氏爲周文所愛

雖在戎旅博延儒生教以書傳周文初入關祥與晉公護俱
在晉陽後遣使迎致之解褐奉朝請少有膽氣志在立功尋
擢補都督從平侯莫陳悅又迎魏孝武以前後功封撫夷縣
伯從擊潼關獲東魏將薛長儒攻回落拔之拜左右直長進
爵爲公大統九年從戰芒山進位驃騎大將軍開府儀同三
司加侍中十四年除都督荊州刺史進爵博陵郡公先是祥
嘗行荊州事雖未基月頗有惠政至是重往百姓安之漢南
流人襁負至者日有千數遠近蠻夷莫不款附祥隨機撫納
咸得歡心時盛夏亢陽境內有發冢暴骨者謂守令曰此豈
仁者爲政邪命所在收葬之卽日澍雨性清素時與梁通好
公私贈遺一無所受梁雍州刺史岳陽王蕭譽欽其風素以
竹屏風絺綌之屬及經史贈之祥難違其意取付所司周文

後聞之竝以賜祥十六年拜大將軍周文以涇渭漑灌之處渠堰廢毀乃令祥修造富平堰開渠引水東注於洛人獲其利魏廢帝二年行華州事後改華州爲同州仍以祥爲刺史尋拜尙書左僕射六官建授小司馬孝閔踐阼進位柱國大司馬晉公護執政祥與護中表少相親愛軍國之事皆與參謀誅趙貴廢閔帝祥有力焉武成初吐谷渾侵涼州郡詔祥與宇文貴討之拔洮陽洪和二城振旅而還進封涼國公薨贈太師同岐等十二州諸軍事同州刺史諡曰景有七子敬讓璨師寬知名敬少歷顯職封化隆縣侯後襲爵涼國公位柱國華州刺史讓大將軍鄭州刺史河東郡公璨開府儀同三司宣陽郡公建德五年從於并州戰歿贈上儀同大將軍追封清都公師尙明帝文位上儀同大將軍幽州刺史博陵

邵公寬開府儀同大將軍武始公入隋歷汴鄭二州刺史並
著政績

侯莫陳崇字尙樂代北部人祖元以良家子從鎮武川因家
焉父興殿中將軍羽林監贈柱國太保清河郡公崇少驍勇
善騎射謹慤少言年十五隨賀拔岳與爾朱榮征葛榮後從
岳入關破赤水蜀又從岳力戰破万俟醜奴崇與輕騎逐北
至涇州長坑及之賊未成列崇單騎入賊中於馬上生擒醜
奴遂大破之封臨涇縣侯及岳爲侯莫陳悅所害崇謀迎周
文帝時原州刺史史歸爲悅守周文遣崇襲歸直到城下卽
擊破門城內鼓譟伏兵悉起遂擒歸斬之以崇行原州事仍
從平悅別封廣武縣伯累遷儀同三司改封彭城郡公從擒
賀泰復宏農破沙苑戰河橋又別討平稽胡累戰皆有功進

柱國大將軍拜大司空周初進封梁國公加太保歷太宗伯
大司徒保定三年從武帝幸原州時帝夜還崇私議宇文護
護遣使將兵就崇宅逼令自殺謚躁護誅改謚莊閔子芮嗣
位柱國從東伐守太行道并州平授上柱國仍從平鄴拜大
司馬

侯莫陳順代武川人少豪俠有氣度初爲爾朱榮統軍普泰
元年封本縣子從孝武入關順與周文帝同里閭弟崇又先
在關中進彭城郡公梁企定逼河州爲大都督討破之尋行
河州事大統四年魏文帝東討順留鎮長安時趙青雀反王
盟周惠達奉魏太子出次渭北順於渭橋與賊戰頻破之魏
文帝還執順手曰渭橋之戰卿有殊功解所服金鑲玉梁帶
賜之南岐州氏羌符安壽遂率部落一千款附改封河間郡

公六年加驃騎大將軍開府儀同三司行西夏州事改平原郡公周初拜少師進柱國卒崇弟瓊荊州總管上柱國封修武郡公瓊弟愷以軍功賜爵下蔡縣男進靈武縣侯周初轉授爲開府儀同三司進公天和中爲司會中大夫建德二年爲聘齊使

以上歸化城廳

獨孤信雲中人本名如願祖俟尼魏和平中以良家子鎮武川因家焉父庫者領人酋長少雄豪有節義北州咸敬服之信美容儀善騎射正光末與賀拔度等同斬衛可瓌由是知名後爲葛榮所獲信少年自修飾服章軍中號獨孤郎及爾朱氏破葛榮以信爲別將後破元顥黨賜爵受德縣侯遷武衛將軍賀拔勝表爲大都督新野郡守與淝陽守韋孝寬政術俱美號爲連璧勝令入關撫賀拔岳餘衆魏孝武雅相委

任孝武西遷信單騎及於渡澗孝武歎曰武衛遂能辭父母捐妻子從我世亂識忠臣豈虛言哉進浮陽郡公爲衛大將軍都督三荊州諸軍事兼尙書右僕射東南道行臺大都督荊州刺史大統六年除隴右十一州大都督秦州刺史事無雍滯示以禮教勸以耕桑數年中公私富實流人願附者數萬家周文以其信著遐邇賜名信十三年移鎮河陽十四年進柱國大將軍錄前後功子善封魏甯縣公穆必要縣侯藏義甯縣侯邑各一千戶順武成縣侯隋建忠縣伯邑各五百戶十六年遷尙書令拜大司馬周初遷大宗伯進衛國公邑萬戶趙貴死晉公護逼令自盡年五十五信美風度雅有奇謀大略周文以隴右形勝故委信鎮之旣爲百姓所懷聲震鄰國在秦州獵日暮馳馬入城帽微側詰旦吏人戴帽者咸

慕信而側帽焉其爲隣境及士庶所重如此信長女周明帝
敬后第四女唐元貞皇后第七女隋高祖文獻后三代皆爲
外戚自古以來未之有也

獨孤善字伏陁信次子幼聰慧善騎射以父勳封魏甯縣公
授驍騎大將軍開府儀同三司加侍中進長城郡公周初除
河州刺史保定三年授龍州刺史天和六年襲河內郡公從
東討以功授上開府尋除兖州刺史政在簡惠百姓安之卒
於州贈使持節柱國五州諸軍事定州刺史子覽嗣隋右候
衛大將軍以上托克托廳

赫連達字朔周盛樂人勃勃之後也曾祖庫多汗改姓杜氏
達性剛鯁有膽力少從賀拔岳征討有功賜爵長廣鄉男及
趙貴議迎周文達贊成其議請輕騎迎之諸將或欲南追賀

拔勝或云東告朝廷達曰此皆遠水不救近火何足道哉謀
遂定孝武入關進魏昌縣伯從破曹泥後復宏農戰沙苑皆
有功詔復姓赫連除雲州刺史進爵公保定初爲大將軍夏
州總管達雖非文吏然性質直遵奉法度輕於鞭撻而重慎
死罪性又廉儉胡人或饋羊達報以綰帛主司請用官物達
曰羊人我廚物出官庫是欺上也命取私帛與之識者嘉其
仁恕尋進樂川郡公柱國卒子遷嗣位大將軍蒲州刺史
閭慶字仁度河陰人曾祖善魏龍驤將軍雲州鎮將因家雲
州之盛樂郡祖提持節車騎大將軍敦煌鎮都大將父進有
謀略勇冠當時正光中拜龍驤將軍衛可瑗作亂率衆拒守
以功拜盛樂郡守慶幼聰敏重然諾風儀端肅望之儼然以
軍功拜步兵校尉中堅將軍齊神武舉兵入洛孝武西遷慶

自宜陽歸闕稍遷後將軍封安次縣子以功進爵爲伯慶善
於綏撫士卒未休未嘗先舍故能盡其死力累遷散騎常侍
驃騎大將軍開府儀同三司雲州大中正加侍中賜姓大野
氏孝閔踐阼出爲河州刺史進爵石保縣公地接戎夷留心
撫納頗稱簡惠就拜大將軍進爵太安郡公入爲小司空歷
雲甯二州刺史慶性寬和不苛察百姓悅之天和五年晉柱
國晉公護母慶之姑也護擅朝而慶未嘗阿附武帝以此重
之詔第十二子毗尙帝女清都公主慶位望隆重婚連帝室
常以謙慎自守建德二年致仕宣帝以慶先朝耆舊特異恆
倫詔靜帝至第問疾大象二年拜上柱國隋初又令皇太子
就第問疾開皇二年卒年七十七

以上和林格爾廳

右北周三十八人

案周太祖家武川地當在蒙古境水經注謂城在白道中谿則

歸綏界內地矣舊志凡宇文氏皆隸甯武非又王
思政楊標諸人皆降於齊齊熾父子皆終於隋不
當與周臣並列今別詳仕實又郭誕陵
川人亦不知何所據隋以前無此縣也

王懿字仲德太原祁人漢司徒允弟幽州刺史懋七世孫也
祖宏仕石氏父苗仕苻氏皆二千石懿少沈寤有意略事母
甚謹學通陰陽解聲律苻氏敗懿年十七及兄叡同起義兵
與慕容垂戰敗被重創走渡河至滑臺爲翟遼所留後奔秦
山晉太元末徙彭城歸王愉愉接遇甚薄因至姑孰宋武帝
結叡使襲桓元事泄叡被害懿竄走獲免建業平爲鎮軍中
兵參軍伐廣固爲前驅戰輒破之與盧循戰左里功冠諸將
封新淦縣侯義熙十二年北伐進征虜將軍冀州刺史督前
鋒諸軍事長安平爲太尉諮議參軍武帝欲遷都洛陽懿曰
今暴師經載士有歸心當以建業爲王基遷都宜候文軌大

同武帝深納之使衛送姚泓先還彭城宋初累遷徐州刺史加都督元嘉中同到彥之北侵司兗三州平三軍咸喜而懿有憂色曰諸賢不諳北土情僞必墮其計魏軍渡河虎牢洛陽並不守乃回軍沿濟南厯城步上焚舟棄甲還至彭城坐免尋與檀道濟救滑臺糧盡歸九年又爲徐州刺史懿三臨徐州威德著於彭城進鎮北大將軍十五年卒謚曰桓子正循嗣懿兄孫文和景和中爲征北義陽王劉昶府佐昶奔魏部曲皆散獨文和送之界上昇明中爲巴陵內史齊永明中厯青冀兗益四州刺史

關康之字伯愉河東楊人僑京口轉僑南昌少而篤學姿狀豐偉與下邳趙繹友善特進顏延之等當時名士十許人入山侯之見其散髮披黃布席松葉枕白石而臥了不相昞延

之等咨嗟而退不敢干也晉陵顧悅之難王賜易義四十餘條康之申王難顧遠有情理又爲毛詩義經籍疑滯多所論釋嘗就沙門支僧納學算妙盡其能徵辟一無所就棄絕人事守志閒居弟雙之爲臧質車騎參軍卒於赭圻瘞水濱康之爲迎喪歸病寢頓二十餘年時有閒日輒臥論文義宋孝武初大使薦康之宜加徵聘不省康之性清約獨居一室希見妻子絕賓客弟子以業傳受河南辛普明允肖之善左氏春秋齊高帝嘗送本與康之康之手自點定又造禮論十卷高帝絕賞愛之宋太始初徵辭以疾

周續之字道祖雁門廣武人僑豫章建昌縣八歲喪母哀戚過成人奉兄如事父豫章太守范甯立學招集生徒續之年十二詣甯受業數年通五經五緯號曰十經名冠同門稱爲

顏子既而閑居讀老易入廬山事沙門釋慧遠與劉遺民陶淵明稱潯陽三隱劉毅鎮姑孰命爲撫軍參軍徵太學博士並不就江州刺史招請頗從游常以稽康高士傳得出處之美固爲之注宋武帝世子居守迎館於安樂寺延入講禮月餘復還山江州刺史劉柳薦之辟太尉掾不就武帝鎮彭城遣使迎之禮賜甚厚每日具高士也尋復南還宋初復召之上爲開館東郭外招集生徒乘輿降幸并見諸生問續之禮記傲不可長與我九齡射於矍圃之義辯析精奧稱爲名通續之素患風痺乃移病鍾山景平元年卒通毛詩六義及禮論注公羊傳於世無子兄子景遠有續之風

柳元景字孝仁河東解人高祖純位平陽太守不拜曾祖卓僑襄陽官至汝南太守祖恬西河太守父憑馮翊太守元景

少便弓馬數隨父伐蠻以勇稱寡言語有器質江夏王義恭鎮荊州以爲城局參軍孝武西鎮襄陽義恭薦以爲武威將軍隨郡太守廣設方略斬獲羣蠻數百郡境肅然隨王誕鎮襄陽徙後軍中兵參軍元嘉二十七年八月北侵加建威將軍紀統軍師後軍外兵參軍龐季明自貲谷入盧氏元景率軍繼進以軍食不足難曠日相持乃束馬懸車引軍上百丈崖出溫谷以入盧氏度熊耳山十一月至宏農營於關方口授宏農太守令衆軍並造陝下列營以逼之魏兵大合乃卷甲兼行一宿而至自詰旦戰至日昃魏軍大潰面縛者二千餘人悉釋遣之時王元謨等敗退上以元景不宜獨進令班師魯爽向虎牢復使北出爽退乃還元景再出北侵威信著於境外孝武入討元凶以爲諮議參軍配萬人爲前鋒至新

亭依山建壘柵東西據險令軍中日鼓繁氣易衰叫數力易
竭但各銜枚疾戰一聽吾營鼓音及察賊衰竭乃命開壘鼓
譟以奔之賊衆大潰劬更率餘衆自來攻壘復大破之劬僅
以身免上至新亭以元景爲侍中領左衛將軍尋爲領軍將
軍加散騎常侍封曲江縣公孝建元年正月左衛將軍王元
謨討魯爽以元景撫軍將軍假節置佐繼進復領南蠻校尉
雍州刺史加都督出屯采石進至姑孰悉遣精兵助元謨以
羸弱居守所遣軍多張旗幟梁山望之如數萬人皆謂都下
兵悉至由是克捷爽平加開府儀同三司改封晉安郡公固
讓開府復爲領軍太子詹事加侍中三年爲尙書令改封巴
東郡公六年進司空侍中中書令固讓乃授侍中驃騎大將
軍南兖州刺史留衛都下尋輔幼主遷尙書令領丹陽尹加

開府儀同三司給班劍二十人固辭班劍元景起自我行及當朝有宏雅之美不營產業南岸有數十畝菜園園人得賣菜錢三萬送還怒曰我立園種菜供家中啖耳乃復賣以取錢奪百姓利邪及宿衛兵出稱詔召之元景整朝服乘車應召弟車騎司馬叔仁及左右壯士數千人欲拒命苦禁之下車受戮容色恬然長子慶宗先賜死次子嗣宗紹宗茂宗孝宗文宗仲宗成宗秀宗竝遇禍元景六弟僧景僧珍叔宗叔政叔珍叔仁僧珍叔仁及子姪死者數十人元景少子承宗嗣宗子暮竝在孕獲全明帝初贈太尉給班劍三十人羽葆鼓吹一部諡曰忠烈公

裴顗字彥齊聞喜人少有異操宋泰始中聰明觀聽講不讓劉秉席秉用爲參軍歷奉朝請齊臺建世子裴妃須外戚譜

顓不與遂與別籍後上表數齊主惡掛冠去之遇害

右南朝宋五人

薛深河東汾陰人魏河東公薛安都從子也果敢有氣力安都降魏親族皆入北齊高帝鎮淮陰深遁歸自結於高帝宋元徽末以軍功至驍騎將軍軍主封竟陵侯豫章王疑守東府使領軍屯司徒右府分備建鄴袁粲據石頭疑夜登西門遙呼深深驚起率軍赴難齊初除淮陰太守尋爲直閭將軍轉太子左率武帝遷左衛將隆昌元年爲司州刺史右將軍卒

右南朝齊一人

王僧辨字君才太原祁人父神念魏潁川太守據郡歸梁封南城縣侯歷安成諸郡皆著政績終右衛將軍僧辨從南徙

學涉該博尤明左氏春秋言辭辯捷器宇肅然梁元帝鎮江州隨府爲中兵參軍安成劉敬躬潛謀亂元帝使僧辨襲安成遂擒敬躬又討平安州蠻以勇略稱元帝鎮荊州僧辨爲貞毅府諮議參軍竟陵太守命總督舟師一萬援臺城城陷侯景悉收其軍實而厚加綏撫遣歸竟陵於是倍道兼行西就元帝承制爲領軍將軍及將攻荊襄令僧辨與鮑泉率師僧辨欲待竟陵部下集然後上頓元帝以爲遷延不去斫之中髀後意解賜以良藥故不死會岳陽王詵襲江陵就獄出僧辨以爲城內都督俄岳陽兵退而鮑泉力不能克長沙命僧辨代之部分將帥并力攻圍遂平湘土還復領軍將軍候景軍次夏首僧辨爲大都督次巴陵沈公私船於水分命衆軍乘城固守偃旗臥鼓安若無人翌日賊至城下城內同時

鼓譟矢石雨下賊乃引退復攻城不克又爲火艦燒柵風不
便自焚而退景遂燒營夜遁元帝以僧辨爲征東將軍開府
儀同三司江州刺史封長甯縣公命卽率巴陵諸軍沿流討
景拔魯山人郢州羅城擒賊帥宋子仙丁和等送江陵郢州
平進師潯陽與陳武帝會於白茅洲升壇歃血共讀盟文辭
氣慷慨皆淚下霑衿發鵲頭中江風浪僧辨再拜告天曰僧
辨忠臣奉辭伐罪當使風息若鼎命中淪請從此逝言訖風
止景自出戰於石頭城北僧辨大破景盧暉略以石頭城降
引軍入據之景走朱方命衆將入據臺城而遣侯瑱裴之橫
東追景僞行臺趙伯超自吳松江降寇悉平改封永甯郡公
詔徵爲都督東上諸軍事南討陸納賊敗歸長沙命築壘固
之而自出臨視賊黨吳藏李賢明等蒙楯直進僧辨據胡牀

不動指揮勇敢遂斬賢明賊退湘州亦尋平因會眾軍西討
敗武陵王紀齊遣郭元建東方老繼進詔僧辨急下赴援次
姑孰卽留鎮焉先命豫州刺史侯瑱築壘東關以拒北軍徵
吳郡太守張彪吳興太守裴之橫會瑱而大敗之振旅歸建
業永聖二年二月詔爲太尉車騎大將軍瑱之丁母憂喪禮
有加是年十月魏遣兵襲江陵元帝徵爲大都督荊州刺史
未至而荊州陷敬帝初卽梁王位承制進驃騎大將軍中書
監都督中外諸軍事錄尙書與陳武帝參謀討伐時齊納貞
陽侯明爲梁嗣僧辨遣第七子顥顯所生劉并弟子珍往充
質遣左戶部尙書周宏正至懸陽迎明又遣吏部尙書王通
送啟因求以敬帝爲嗣明報許之濟江同會於江甯浦明踐
位授僧辨大司馬領太子太傅揚州牧陳武帝自京口舉兵

襲之僧辨常處石頭城是日視事軍人已踰城北而入南門
又白有兵來僧辨與子顗遽走出閣計無所出乃據南門樓
陳武縱火焚之方共顗下就執陳武曰何意全無防備僧辨
曰委公北門何謂無備是夜及子顗俱遇害弟僧智就任約
約敗走亦遇害

王僧愔僧辨弟位譙州刺史征蕭勃及聞兄死引軍還吳州
刺史羊亮密召侯瑱見擒僧愔以名義責瑱因復得奔齊與
徐嗣徽等攻陳軍敗竄逸仰天歎曰讐恥不雪未欲身膏野
草若精誠有感當得道路誓不受辱人手聞空中催令急去
僧愔異之勉力馳進行一里顧向處已有陳人踰越江山僅
得歸齊

王顗僧辨子承聖初位侍中陳武帝鎮京口僧辨結廉蔭之

分且爲第三子願聘陳武章后所生女顗屢諫不聽後王琳入齊爲竟陵郡守齊遣琳鎮壽春將圖江左及陳殺琳顗聞之乃出郡城南登高冢上號哭一慟而絕

柳敬禮元景族子少以勇烈聞而性爲暴襄陽有柳四郎歌起家著作佐郎稍遷扶風太守率馬步三千援臺城與侯景頻戰甚著威名及景令仲禮經略上流留敬禮爲質景餞仲禮於後渚敬禮謂仲禮曰景今來會敬禮抱之兄便可殺雖死無恨仲禮壯其言許之及酒數行敬禮曰仲禮見備衛嚴不敢動遂不果會景攻晉熙敬禮與南康王會理謀襲其城克期將發建安侯蕭賁告之遂遇害臨死曰我兄老婢也今日就死豈非天平

張遼字深明河東閿鄉人魏冀州刺史徽之後也祖壽孫儻

壽陽爲宋前軍長史父仲穆驍騎將軍遂十歲能屬文善左氏春秋齊末始安王蕭遙光引爲揚州參軍遙光敗還壽陽刺史裴叔業降魏隨衆北徙爲魏郡太守王肅鎮壽陽遂固求隨肅梁天監初自拔南還除後軍諮議參軍求邊境自効爲廬江太守五年征邵陽洲魏人爲長橋斷淮以濟遂築壘還橋每戰輒剋密作沒突艦會淮水雨溢乘艦徑造橋側進擊大破之以功封夷陵縣子遷廣陵太守旋左遷始安太守遂志立功致書呂僧珍曰昔阮咸顏延有二始之歎吾才不逮古人今爲三始非其願也將如之何後爲竟陵太守開置屯田公私便之再遷西戎校尉北梁秦二州刺史復開倉屯田數千頃倉廩盈實省息邊運人吏獲安相率餉絹千餘匹遂從容曰汝等不應爾吾又不可逆納其二匹而已入爲大

匠卿普通二年義州刺史文僧明以州入魏遂爲信武將軍督衆討之深入魏境出其不意魏義州刺史封壽據檀公岷遂擊破之遂圍其城壽請降義州平除豫州刺史加督鎮合肥四年督征討諸軍事先襲壽陽攻其郛斬門而入一日戰九合以後軍蔡秀成不至拔還復整兵令諸將各以服色相別遂自爲黃袍騎先攻拔狄邱甕城黎漿又屠安成馬頭沙陵等戌明年略地至汝潁間所在響應魏壽陽守將長孫承業與河間王元琛出城挑戰遂臨淮歎曰今日不破河間方爲謝元所笑乃出四甄以待之令直閣將軍李祖憐僞遁承業等悉衆來追四甄競發魏衆大敗斬首萬餘級承業走閉門不敢復出遂疾篤命衆軍守備卒贈侍中左衛將軍進侯諡曰烈遂沈深有思路爲政寬明能得士心居身方正有

威重將吏少敢犯法及卒淮肥間莫不流涕子之禮字子義
美儀容能言元理爲西豫州刺史母憂惟食麥飯歷位黃門
侍郎武帝設無遮會儼象驚排突陛衛王公皆散唯之禮不
動上壯之以爲壯勇將軍北徐州刺史卒於少府卿謚曰壯
子政承聖中給事黃門侍郎隨例入長安

右南朝梁五人

案王柳裴薛諸家頗多名臣然自其祖父已宦南朝史云太原人物

東人者皆推本言之耳茲探其始遷於南及有涉北朝者數人餘並從略

山西通志卷一百二十